

FORUM

Films vegls da Ruschein

La proxima sera da cuminonza a Ruschein meina anavos en in temps nua che mo fetg paucs vevan ina camera per filmar. In da quels era Louis Hartmann da Lucerna (1908 – 1994), che ha fatg cuort suenter la secunda uiara mundiala regularmein vacanzas a Ruschein cun sia famiglia. El ha filmau denter auter 1949 «ils cavers da Ruschein» e 1951 quei che prest mintga famiglia fageva sezza el vitg: «paun casa».

Avon circa 50 onns ha Albert Klaiss (1935 – 1992) da Ruschein documentau cun sia camera numerus muments dil mintgagi el vitg: «arar cun cavagl», «ir a schar moler il graun», «la scoletta e la scola pintga 1972/73», «cat-tar biemaun». En ina da sias produziuns ha el filmau la generaziun veglia da gliez temps, persunas ch'eran naschidas zacons onns avon l'emprema uiara mundiala. El duei ver getg a quellas: «Fagei cura che jeu filmeschel zatgei che Vos fageis bugen ni adina puspei.» Ord-lunder ha quei dau in interessant document che regorda oz in ni l'autra dil vitg al bab ni la mumma, al tat ni la tatta, al basat ni la basatta, gie schizun agl urat ni l'uratta.

Ils films per noss'occurrenza ein vegni mess a disposiziun a nus dil Museum Regiunal Surselva a Glion. Nus vein scursaniu qua-



Ord il film «Ils cavers da Ruschein».

FOTO MAD

si tuts per la sera da cuminonza e mess ensem in mosaic da nov films cuorts – tut films mets, ils emprems en ner alv. El decuors dalla sera dat ei era ina cuorta orientaziun da *Flavio Huonder* dad RTR sur dalla plattafuorma «nossaistorgia.ch». Beinvegnidas ein sco adina era persunas d'ordeifer. L'entrada ei gratuita.

Films vegls da Ruschein. Sonda, ils 3 da settember 2022 allas 20.15, Casa da scola Crestas, Ruschein. Dapli sin www.dacuminonza.ch

Per la gruppa d'interess «da cuminonza a Ruschein – la sera dils treis»: Maria Cadruvi ed Andreas Joos